

INUIT ATAQATIGIIT

Inatsisartuni



Aasiaat 30. januar 2017

Inatsisartut suleriaasianni § 37 naapertorlugu Naalakkersuisunut imaattunik apeqquteqarpunga:

- 1. Aalisakkerivinni sulisussanik ilinniartitsineq nunatsinni sumi periarfissaava?**
 - a. Peqarpat: Sumi ilinniartoqarsinnaava?
 - b. Ilinniartut qanoq ilinniartinneqartarpas? Suna ilinniartarpaat?
 - c. Ilinniartut qanoq amerlatigippat?
- 2. Aalisakkerivinni piariikkanik tunisassiorfiusinnaasuni sulisussanik ilinniarfeqannngippat, ilinniarusuttut ilinniarnissaannik neqeroorfingeqarsinnaalersinnaanissaannik naalakkersuisut pilersaaruteqarnerpat?**
- 3. Nunatta pissarititaanik tunisassiorfinni sulinissaq kajuminnarnerulersinniarlugu Naalakkersuisut qanoq pilersaaruteqarpat? Soorlu aalisakkerivinni Neqi A/S-milu.**
- 4. Nunatta avataani nunat & ilinniariit sorliit isumaqatigiissuteqarfiuppat aamma qanoq naleqarpat imlt. aningaasalersorneqarpat:**
 - a. Atuartut nunatsinnersut nuna allani qassiuppat aamma Fag-inut sunut sammippat? (DK-ip avataani)
 - b. Agguaqatigiisillugu ilinniartoq ataaseq qanoq kr. naleqarpa?
- 5. Nunatsinni amigaatignerpaasatta ilagaat qaffasissumik ilinniarsimasut soorlu; Biologit, arktisk ingeniører, ingerlatsinermut tunngasunik ilinniarluarsimasut, inatsisilerituut, aningaasaqarnermut akileraartarnermut tunngasunik ilinniagartuut, nakorsat, kigutit nakorsaat, tarnip nappaataanut ilisimatuut (psykolog) il.il.**
 - a. Tamanna aaqqiiviginiarlugu Naalakkersuisut qanoq pilersaaruteqarpat? Amigaataasut qulaani pineqartut nunatsinnersunit inuttalerneqarsinnaernissaat anguniarlugu Naalakkersuisut qanoq iliuuseqarniarpat? Qanoq pilersaaruteqarpat?
 - b. Ilimmarfiup, Ilisimatusarfiillu allat, nunatta qaffasissumik ilinniarsimassutsikkut amigaatigisaanik qulaani pineqartunik pissarsiffiulluarnerulernissai pilersuinerulernissalaq anguniarlugu Naalakkersuisut qanoq pilersaaruteqarpat?

(Inatsisartuni ilaasortaq Peter Olsen, Inuit Ataqatigiit)

Tunngavilersuut

Ilinniartitaaneq ilinniartitaaneq aammalu ilinniartitaaneq. Oqaatsit taakku ukiorpassuanngulersuni politikkikut oqariartuutigissallutigit uteqattaartuartsimavagut,

nunatsinni aaqqitassarpassuit pillugit, nunatta siunissaa pillugu, nunattalu namminilivinnis-saa pillugu oqallisileraangatta.

Aap, 1979-mi ilinniartitaanermut tunngasoq akisussaaffik tigunikkuarpuit, aap taassuma kingorna ilinniarfiusinnaasorpassuit DK-mi ingerlanneqartarsimagaluartunik nunatsinnut angerlaassiniukuuvugut, ilinniarfippassuarnillu nutaanik nunatsinni pilersitsiortorsimalluta; GUX, Ilisimatusarfik, Niunermermik Ilinniarfiit, HTX, Arktisk Ingenør arlappassuillu uani taaneqanngikkaluartut.

Amerlanerpaartaasugut nunarput qimanngikkaluarlugu ilinniarfigerusussinnaasarput nunatsinni ilinniarfigisinnaalersimavarput. Tamanna pitsasuuvvoq siuarineruvorlu assortorneqarsinnaangitsoq. Taamaakkaluartorli ajoraluwartumik suna tamarmi pitsaanerpaamik ingerlanngilaq. Naak tamanna killormorluinnaq inissimasussaagaluartoq.

Naatsumillu oqaatigissagutsigu 1979-milli ilinniartitaanermut akisussaaffik tigugatsiguli, aatsaat taama meeqqat atuarfiannik naammassinntartut ikitsigilersimapput, meeqqat atuarfinni angusat aatsaat taama appasitsigilersimapput, inuussutissarsiutigalugu ilinniarfissaminut ingerlaqqittartut aatsaat taama ikitsigilersimapput, allamiut oqaasinik angusarisartakkat aatsaat taama appasitsigilersimapput.

Naatsumik oqaatigalugu ilinniarsimassutsikkut aatsaat taama appasitsigumik inissimaffeqalersimavut; Nuna namminilivikkusuttoq, nuna imminut napatikkusuttoq, nuna imminut akisussaaffigelerusuttoq, nuna imminut aqukkusuttoq, imminullu pilersornerulerusuttoq taamatut inissiminasinnaangilaq. Taamaattoqarsinnaangilaq pitsaanerusariaqarpoq allannguisariaqalerpugullu.

Suliassaqarpugut angunigassaqarpugullu imaannaannngitsumik. Ilinniartitaanikkut aningaasaliissutigisartakkagut eqqortumik atortarpagut? Imaluunniit pitsaanerusumik atorsinnaagaluarpagut? Ilinniartitseriaaserput ullumikkumut tulluuppa?

Inuiaqatigiit allannguisariaqalinnginnerpugut? Ilinniartitaanerullu tungaatigut allannguillatalu nutaamik eqqarsarlatalu nalilersueqqittariaqalinnginnerpugut?

Piffisanngorpoq alloriaqqinnissatsinnut, nutaaliornissatsinnut, nalilersueqqinnissatsinnut allannguinissatsinnullu.

Taamaattumik taamatut tunngavilersuuteqarlunga matumuuna apeqquteqaatikka ingerlateqqippakka.

Kissaatigaaralu apeqquteqaatima ullut qulit qaanngiutinnagut akineqarnissaa.